

## Buruu Toodt Algo

wilid weeyi taffaabba ayga ideenga edkire iyyon. taffaabikkon eryaal weekka sokkoottira iigatiron: in eryaalika kaagintaan juwa, eged weekka ken dummeda, eryaal anga firrafiin wiittir ekkikkan ideenga fa edkeer. wildikkon eryaalka sokkeda falooson. tanynyafiintaangoon id weekka sikkal eleda taddan jammooson. taddan tanynyafiini, weekkuuli maree weekka ewir kakka goorinnan angooson gooralley menjijinnan idta issigon: abanenga, man maree ewirfiiraa walla ewirfiimeenira? ele angatood maree ewirfii gooralley aagjinnanga neentaannee ayga issigii iyyon. tanynyoochchisan. tananya juukanii, weekkuu jenaaza weekka enna kaaginnan. wildikkon issigon: ele abanenga man aanyoraa walla diyoraa? iigon: angatood, jenaaza angareelog sokka kaaginnanga neentaannee ayga issigii? tanynyoochchisan. tananya juukanii urti zeriiba dawwi wee daaffin! wildikkon issigon: ele abanenga in urti marissood naanaa? ele angatood iyyon: urti diigid zeriibag jangafiika neentaannee maristookkay ayga issigii? tananya juukangoon urti marisseredi zeriiba weella daaffin. iigon: ele abanenga, in urti diigid in zeriibal daaffii naaguunaa? angatood iigon, urti diigidtoon urti mariss innaa, urti marissoottoo urti diigid innaa? kir tanynyella wiida, idli dirka koffa kaagin wildikkon eddil sokka kaagin. tuubarra juusan keellogooni, idikkon oos eddil idrechchon wildikkon koffechchon weekkon dirka sokkechcha tuubafin, weekkon dirka koffechchha tuubafin. tuubagoon faloshshan. idli banynyon: angatood, inii baadta ir hiddo ha juu? juu aydan beyyitoosa walio iriin firgen agarra juwaannameeni, juu aydan beyyiton. kiyyeda noogil juwagoon tannaska iigatiron: wilid derwiishterekkon aydan daannaani, ashaag diigdakir idir. buruu banynyon: woon hikkir derwiisha ele aabba? takkon moollo tiigoosa wilidn aawsingga ingirgoon aawon ingirgoon aawoonay iigjatiron. tannasikkon laala tar wilid derwiisha immunna iyyon, tar wilidlekin uneegattili asliig daammun. kabakka idir taffaabba sokkoottiragoon, taffaabbin juu wildiddan kabja kireffaani, etnaashar kumbuug arija santee weella fogod idachcha, suu weekka wallikir tobbikiroosa taffaabba sokkoottira iigatiron: juu tar wilid derwiish iddan daarikka iigatir: ikka annasi, shaharikkon etnaashar shahara mosooren amangon oboliddan tobbafiina iigonaya. idikkon iskittiddog sokkeda nogafiintaani, kumbuu weekkoon sokka kabjon, suu gumbee uwwoogoon dukkechchon. juu wilidta sokkateentaangoon iigatiron: ikka annasi, shaharikkon etnaashar shahara mosooren amangon oboliddan tobbafiina iyyon. kumbuug oomir oomir kabkangoon hidaashara suukkon marwafin. takkon idta iigatiron: juu innaska iigatir: galtafiiname, shaharikkon hidaashar shahara, mosooren amangon obollatoon kedekka sukkafiyon. juu buruug ikka iskittitood ingir ingir banynyona iyyongoon buruuli banynyon: ele aabba, kumbuu weera suu gumbee uwwoli ikka

minga aawateenay kumbuugoon sokka kabii suugoon nii? iigon: aa jelli takkiral fi? tariin baatta buruuli wildiddog juwagoon iigatiron: habaabak annenga iskitti, hiddolog daari iyyon. banynyony: ayga abooli eryaal weekka deenoosa juu egd weekka eryaallog dummeda, eryaal anga firrafiin wiittir edakire iyyon. buruukkon tar eryaal inga ekkirey dummedon. juwagoon egd weekka eryaallog jaaneda kira, magassi tanga dumma egdin shigirtig gananya ishriin dikkeekachcha ingoon weekka girshilogo mangoon weekka girshilog jaanjatichcha ishriin girishka jemmita ejjuu iigatiron: ingon egd innin ingon eryaal inninaan kutta iboog aawirtir. takkon kutta egdtoon kiyyeda eryalkoon sokkeda taffaabiddog juu ingon egdillin ingon eryaallina iyyon. faabl iigon: yalla kutta ibanengan askuultoon ed, yaan ineen essin askuultoon ed. wildikkon laala iyyon, ay fa inna edmun, ay fa matto juu edil. mandogoon buruuli taffaabba hikkir iigatiroo? aabba, in wildillee derwiisha? tar zeraa ewirfii tariin ikka banynyisiini, kojir tanni halaal argadee tanni halaal, tii tanni halaallog ewirfiinaa ewirfin, uttuuddottoon juu kojirkoon sokkaakkhan tiikkonnong sherkara ikkan argadeekkonnong tanna immeenkan, ewirfiimeenillinay ikka banynyin. tar jenaaza sokka kaagsan, abaak tanni wilid unnafiinaa, tarli aanyafin, wilidta kummeena diyoraa, asliig diyoosollinay ikka banynyony. tar zeriibal urti diigid daaffiyoyi, jabiin teddan daaffiimeenellin. man zeriiba marissookkoni jabiin teddan daaffiyellin. mangon eliilekin wallo fa marsangin, ingon eliilekin wallo fa diigdangin. tan baharin tuul ken merkuubba koffisiington, baharin tuul kiikkii takka fa shaagkan, gindee fa shaagkan irbimmuininnog tan ken dirka koffisiinnin. buudikkon haaja wiirkafii mallekka maany tannin nalellin, in wilid karjora! wildikkon matto fala juu firga baleeg aawa man buruug edooson. faabli wiida minga firgii? tannasiddottoon ufaa tanga sokkinnanga. wallockkido wiida, seringiga kaagintaani, tannasi kiimlog kuffeda aagin juu kutta menjatiron. ay fa juu agar filaanna farree dawwillaa seringa naangngileeni, wilidta unnedakir, keyyikiredakir, kabar anga sokkoottira iron idimmeenkan, ay fa wiida kir gumur inga merre iigon. buruukkon haadir iyyon. taffaabin seringa naangngalley juusiin wagidtoon, man nooyin kitti tanguug dukkij iskiroochcha, kutta bantaloon tan weekka idir, tarbuush tan weekka koffa, murti tan weekka dooga, seef tan weekka sokkeda, juu taffaabin kochchil menja, salaama aleykum iyyon! faabikkon aleykum essalaam yaa amiir elmuuminiin iyyon. issigon: tar iriin aag ewre minaaraya. seringa iyyon. iigon: ay ingir murti dooga menjiliiga, tar seringa ewredakir, feyyikiredakir, gangariikiredakir, murti anga iron kabkimmeenkan, gumur inga sokkeda fa nogil. idikkon banynyony: woon hisoon naangngilee, hisoon feyyii, hisoon gangariingii, hisoon murti inga kabkiyyaa? takkon iigon: woon buruug hisoon edsaa, hisoon ididdog juwoo, hisoon juntangoo, hisoon unno, hisoon kabakka ikka arratee? iriin aallee iyyon. eyyo ayiin aallina iyyon. salaam aleykum. wiidakir kitti nooy tanga idrechchagoon, kiimla

tiigooson. mangon kir aselteredaa sheeriyyaterellog noogiddo gadaag kabja  
tiigon!